

Teodosi Deragisch (1888–1944)

Mo treis meins suenter la mort da siu frar, pader Placi Deragisch, ei era pader Teodosi suandaus – el reginavel dils vivs. El veva mo 56 onns e treis meins. Tgi che ei tier nus sur ils 65, ha tgunsch aunc viu ed udiu quei missiunari marcant e popular. Ussa ei sia fossa el santeri clastral a Sviz 50 onns veglia. Leu, en pietad ed engraziament, in mudest matg da flurs da cuolm e steilalva.

Iniziazion

Teodosi ei siu num digl Uorden. Battégiaus era el sin Tumaisch Baseli. A Bugnei/Tujetsch steva sia tgina. Il giuven d'ina gronda famiglia. Il bab, Emanuel Deragisch, mava la stad ad alp e prendeva cun el il fegl benjamin. Igl ulterior temps s'occupava el sco ligacudischs. La mumma Luisa n. Valier era ina prusa casarina, sco ella ei presentada ella canzun da Salomon. Mintga damau fageva ella il viadi enta Sedrun a messa. Cun dus fegl sacerdots ha il Segner benediu e legrau ella. Pietusadad seigi oz buca modern. Moschapia, ch'ils moderns secumentien cun lur sort e destin!

Scolar Tumaisch mava a Sedrun a scola. Mintga di quater ga spel «Sontget dils gedius» ora. Tgisà, ha el priu leu il conclus da defender il Segner plagau, da suendar e perdegar el? Sche eis el ius on claustra ad emprender latin. Ed a Stans tiels caputschins a finir il gimnasi. Il settember 1909 entscheiva il noviziat sil Wesemlin a Lucerna. Ei suonda in pèr onns studi teologic en diversas claustras digl Uorden. Ils 15 da zercladur 1915 vegn il primziant pader Teodosi ordinans spiritual e fa sia messa nuviala a Sotourn.

Missiun

Ussa entscheiva pader Teodosi sia carriera da nunstunclenteivel apostolat. El carga la lavur cun braunca ferma. Dallas claustras da Sursee, Wil, Stans, Mels, Rapperswil e Sviz anora, meina sia via ora ellas pleivs. Ins cloma el sin fiastas ed occasiuns. P. Teodosi ei propri il missiunari. Ed oravontut, igl Uorden ha destinau el per las missiuns popularas en tiara romontscha. Ei dat bein strusch ina suletta pleiv en Surselva e Surmir, che vess buca gudiu ina, duas e schizun treis ga sias missiuns; savens ensemen cun siu frar pader Placi, ni era cul confrar caputschin, pader Roc Caduff p.m.

Pader Teodosi veva in dun particular



da perdegar. Da plidar culont, clar, popular e fascinont. Il flum da sia retorica era magari mischedaus cun saun humor. Buca per divertir, per instruir, per por-scher vivonda spirituala, bien paun-casa per l'olma. Ins tedlava bugen – vessi tedlau aunc ditg. El ha fatg en tut varga 100 missiuns e savens era exercezis.

Perfecziun

Ina perdetga contemporana ha constatau: «Sia clara ed imposanta vusch tunava beinduras sco la ramur dil tun e penetrava el pli davos cantun dallas pli vastas baselgias. Ses priedis fuvan clars e solids, siu lungatg sempels e bials, sia dicziun svariava en in tun patern, mischedaus cun accords calirai e humor natural. El enconuscheva buca cumadei-vels cumpromiss e biala tschontscha. Siu pugn da fier marclava vezis ed isonzas impestadas... dasperas in bab bunta-deivel en confessiunal» (Gas. Rom. 10-8-1944).

Uras ora en confessiunal en baselgias freidas san nuscher alla sanadad. Ils davos onns ha pader Teodosi entschiet a piarder sias forzas. Il cor era dapi entgin temps attaccaus, auter era buc en uorden. Presentim? Dapi la mort da siu frar, pader Placi, plidava el bia dil murir. Alla fin da sias missiuns rugava el beinduras ses auditurs d'urar per el, cura ch'il zenn da miert tuchi. P. Teodosi sto sesuttametter ad ina operaziun el spital da Sviz. Il cor ha snegau siu survetsch. Ed il Segner ha detg: «Neu ti bien e fideivel survient...» Ei era ils 19 da fenadur endamaun, ch'il zennet clastral ha tuccau da miert.

sur Felici Maissen